

道春点

七書

六翰

六

庫文閣内			
函	六〇二六	漢	
架	一七六	書	
冊	七	類	

漢書門			
冊	七	函	六〇二六
架	一	號	一五
類	七		六

内閣文庫			
番號	漢	6026	
冊數	7 (6)		
函號	299	222	



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



六韜

文韜

文師

淺草文庫

文王將田史編布上曰田於渭陽將大得焉非龍
 非麇非虎非鼯兆得公侯天遺汝師以之佐昌施
 及三王文王曰兆致是乎史編曰編之太祖史疇
 為禹占得臯陶兆比於此文王乃齋三日乘田車
 駕田馬田於渭陽卒見太公坐茅以漁文王勞而
 問之曰子樂漁邪太公曰臣聞君子樂得其志小
 人樂得其事今吾漁甚有似也殆非樂之也文王

曰何謂其有似也太公曰釣有三權權祿等以權死
等以權官等以權夫釣以求得也其情深可以觀
夫矣文王曰願聞其情太公曰源深而水流水流
而魚生之情也根深而木長木長而實生之情也
君子情同而親合親合而事生之情也言諾應對
者情之飾也言至情者事之極也今臣言至情情直
作泰不諱君其惡之乎文王曰唯仁人能受正諫
不惡至情何為其然太公曰緝微餌明小魚食之
緝調餌香中魚食之緝隆餌豐大魚食之夫魚食
其餌乃率於緝人食其祿乃服於君故以餌取魚

魚可殺以祿取人人可竭以家取國國可拔以國
取天下天下可畢嗚乎曼曼曼曼其聚必散嘿
嘿昧昧其光必遠微哉聖人之德誘乎獨身樂哉
聖人之慮各歸其次而榘歛焉文王曰榘歛若何
而天下歸之太公曰天下非一人之天下乃天下
之天下也同天下之利者則得天下榘天下之利
者則失天下天有時地有財能與人共之者仁也
仁之所在天下歸之免人之死解人之難救人之
患濟人之急者德也德之所在天下歸之與人同
憂同樂同好同惡者義也義之所在天下赴之凡

人惡死而樂生好德而歸利能生利者道也道之所在天下歸之文王再拜曰允哉敢不受天之詔命乎乃載與俱歸立為師

盈虛

文王問太公曰天下熙熙一盈一虛一治一亂所以然者何也其君賢不肖不等乎其天時變化自然乎太公曰君不肖則國危而民亂君賢聖則國安而民治禍福有君不在天時文王曰古之賢君直賢君可得聞乎太公曰昔者帝堯之王天下上世所謂賢君也文王曰其治如何太公曰帝堯王

天下之時金銀珠玉不飾錦綉文綺不采奇怪珍異不視玩好之器不寶滄快樂不聽宮垣屋室不望塵楠椽楹不割茅茨徧庭不剪鹿裘御不寒布衣掩形糲梁之飯藜藿之羹不以役作之故害民耕織之時削心約志從事乎無為吏忠正奉法者尊其位廉潔愛人者厚其祿民有孝慈者愛敬之盡力農桑者慰勉之旌別淑德表其門閭平心正節以法度禁邪偽所憎者有功必賞所愛者有罪必罰存養天下鰥寡孤獨賑贍禍亡之家其自奉也甚薄其賦役也甚寡故萬民富樂而無饑寒之

色百姓戴其君如日月親其君如父母文王曰大哉賢君之德也直作賢德之君也

國務

文王問太公曰願聞為國之大務欲使主尊人安為之奈何太公曰愛民而已文王曰愛民奈何太公曰利而勿害成而勿敗生而勿殺與而勿奪樂而勿苦喜而勿怒文王曰敢請釋其故太公曰民不失務則利之農不失時則成之省刑罰則生之薄賦歛則與之儉宮室臺榭則樂之吏清不苦擾則喜之民失其務則害之農失其時則敗之無罪

而討則殺之重賦歛則奪之多營宮室臺榭以疲民之力則苦之吏濁苛擾則怒之故善為國者馭民如父母之愛子如兄之愛弟見其饑寒則為之憂見其勞苦則為之悲賞罰如加於身賦歛如取於已此愛民之道也

大禮

文王問太公曰君臣之禮如何太公曰為上唯臨為下唯沉臨而無遠沉而無隱為上唯周為下唯定周則天也定則地也或天或地大禮乃成文王曰主位如何太公曰安徐而靜柔節先定善與而

不爭虛心平志待物以正文主曰主聽如何太公
曰勿妄而許勿逆而拒許之則失守拒之則閉塞
高山仰止不可極也深淵度之不可測也神明之
德正靜其極文主曰主明如何太公曰目貴明耳
貴聰心貴智以天下之目視則無不見也以天下
之耳聽則無不聞也以天下之心慮則無不知也
輻湊並進則明不蔽矣

明傳

文王寢疾召太公望太子發在側曰嗚呼天將棄
予周之社稷將以屬汝今予欲師至道之言以明

傳之子孫太公曰王何所問文主曰先聖之道其
所止其所起可得聞乎太公曰見善而怠時至而
疑知非而處此三者道之所止也柔而靜恭而敬
強而弱忍而剛此四者道之所起也故義勝欲則
昌欲勝義則亡敬勝怠則吉怠勝敬則滅

六守

文王問太公曰君國主民者其所以失之者何也
太公曰不慎所與也人君有六守三寶文王曰六
守何也太公曰一曰仁二曰義三曰忠四曰信五
曰勇六曰謀是謂六守文主曰慎擇六守者何太

公曰富之而觀其無犯貴之而觀其無驕付之而
觀其無轉使之而觀其無隱危之而觀其無恐事
之而觀其無窮富之而不犯者仁也貴之而不驕
者義也付之而不轉者忠也使而不隱者信也
危之而不恐者勇也事之而不窮者謀也人君無
以三寶借人借人則君失其威文王曰敢問三寶
太公曰太農太工太商謂之三寶農一其鄉則穀
足工一其鄉則器足商一其鄉則貨足三寶各安
其處民乃不慮無亂其鄉無亂其族臣無富於君
都無大於國六守長則君昌三寶完則國安

守土

文王問太公曰守土奈何太公曰無疏其親無怠
其衆撫其左右御其四旁無借人國柄借人國柄
則失其權無掘壑而附丘無舍本而治末日中必
彗操刀必割執斧必伐日中不彗是謂失時操刀
不割失利之期執斧不伐賊人將來涓涓不塞將
爲江河熒熒不救炎炎奈何兩葉不去將用斧柯
是故人君必從事於富不富無以爲仁不施無以
合親疏其親則害失其衆則敗無借人利器借人
利器則爲人所害而不終於世文王曰何謂仁義

太公曰敬其衆合其親敬其衆則和合其親則喜
是謂仁義之紀無使人奪汝威因其明順其常順
者任之以德逆者絕之以力敬之無疑天下和服

守國

文王問太公曰守國奈何太公曰齊將語君天地
之經四時所生仁聖之道民機之情王即齊七日
北面再拜而問之太公曰天生四時地生萬物天
下有民仁聖牧之故春道生萬物榮夏道長萬物
成秋道歛萬物盈冬道藏萬物靜盈則藏藏則復
起真知所終真知所始聖人配之以爲天地經紀

故天下治仁聖藏天下亂仁聖昌至道其然也聖
人之在天地間也其實固大矣因其常而視之則
民安夫民動而爲機機動而得失爭矣故發之以
其陰會之以其陽爲之先唱天下和之極反其常
莫進而爭莫退而讓守國如此與天地同光

上賢

文王問太公曰王人者何上何下何取何去何禁
何止太公曰王人者上賢下不肖取誠信去詐偽
禁暴亂止奢侈故王人者有六賊七害文王曰願
聞其道太公曰夫六賊者一曰臣有大作宮室

池

榭遊觀倡樂者傷王之德二曰民有不事農桑任
氣遊俠犯歷法禁不從吏教者傷王之化三曰臣
有結朋黨蔽賢智鄭主明者傷王之權四曰士有
抗志高節以為氣勢外交諸不重其主者傷王之
威五曰臣有輕爵位賤有司羞為上犯難者傷功
臣之勞六曰有強宗侵奪陵侮貧弱者傷庶人之
業七害者一曰無智略權謀而以重賞尊爵之故
強勇輕戰僥倖於外王者慎勿使為將二曰有名
無實出入異言掩善揚惡進退為巧王者慎勿與
謀三曰朴其身躬惡其衣服語無為以求名言無

欲以求利此偽人也王者慎勿近四曰奇其冠帶
偉其衣服博聞辨辭虛論高議以為容義躬居靜
處而誹時俗此姦人也王者慎勿寵五曰讒佞苟
得以求官爵果敢輕死以貪祿秩不圖大事得利
而動以高談虛論說於人主王者謹勿使六曰為
彫文刻鏤技巧華飾而傷農事王者必禁之七曰
偽方異枝巫蠱左道不祥之言幻惑良民王者必
止之故民不盡力非吾民也士不誠信非吾士也
臣不忠諫非吾臣也吏不平潔愛人非吾吏也相
不能富國強兵調和陰陽以安萬乘之主正群臣

定名實明賞罰樂萬民非吾相也夫王者之道如
龍首高居而遠望深視而審聽示其形隱其情若
天之高不可極也若淵之深不可測也故可怒而
不怒姦臣乃作可殺而不殺大賊乃發兵勢不行
敵國乃強文王曰善哉

舉賢

文王問太公曰君務舉賢而不獲其功世亂愈甚
以至危亡者何也太公曰舉賢而不用是有舉賢
之名而無用賢之實也文王曰其失安在太公曰
其失在君好用世俗之所譽而不得其賢也文王

曰如何太公曰君以世俗之所譽者為賢以世俗
之所毀者為不肖則多黨者進少黨者退若是則
群邪比周而蔽賢忠臣死於無罪姦臣以虛譽取
爵位是以世亂愈甚則國不免於危亡文王曰舉
賢如何太公曰將相分職而各以官名舉人按名
督實選才考能令實當其名名當其實則得舉賢
之道也

賞罰

文王問太公曰賞所以存勸罰所以示懲吾欲賞
以勸百罰以懲衆為之奈何太公曰凡用賞

者貴信用罰者貴必賞信罰必於耳目之所聞見
則所不聞見者莫不陰化矣夫誠暢於天地通於
神明而況於人乎

兵道

武王問太公曰兵道如何太公曰凡兵之道莫過
乎一二者能獨往獨來黃帝曰一者階於道幾於
神用之在於機顯之在於勢成之在於君故聖王
號兵為凶器不得已而用之今商王知存而不知
亡知樂而不知殃夫存者非存在於慮亡樂者非
樂在於慮殃今王已慮其源豈憂其流乎武王曰

兩軍相遇彼不可來此不可往各設固備未敢先
發我欲襲之不得其利為之奈何太公曰外亂而
內整示飢而實飽內精而外鈍一合一離一聚一
散陰其謀密其機高其壘伏其銳士寂若無聲敵
不知我所備欲其西襲其東武王曰敵知我情通
我謀為之奈何太公曰兵勝之術密察敵人之機
而速乘其利後疾擊其不意

武韜

發啓

文王在豐召太公曰嗚呼商王虐極罪殺不辜公

尚助予憂民如何太公曰王其修德以下賢貞民
以觀天道天道無殃不可先倡人道無災不可先
謀必見天殃又見人災乃可以謀必見其陽又見
其陰乃知其心必見其外又見其內乃知其意必
見其疏又見其親乃知其情行其道道可致也從
其門門可入也立其禮禮可成也爭其強強可勝
也全勝不闢太兵無創與鬼神通微哉微哉與入
同病相救同情相成同惡相助同好相趨故無甲
兵而勝無衝機而攻無溝塹而守大智不智太謀
不謀太勇不勇太利不利利天下者天下啓之害

天下者天下閉之天下者非一人之天下乃天下
之天下也取天下者若逐野獸而天下皆有分肉
之心若同舟而濟濟則皆同其利敗則皆同其害
然則皆有啓之無有閉之也無取於民者取民者
也無取於國者取國者也無取於天下者取天下
者也無取民者民利之無取國者國利之無取天
下者天下利之故道在不可見事在不可聞勝在
不可知微哉微哉鷙鳥將擊卑飛飲翼猛獸將搏
耳俯伏聖人將動必有愚色今彼有商衆口相
惑紛紛渺渺好色無極此亡國之徵也吾觀其野

草菅勝穀吾觀其衆邪曲勝直吾觀其吏暴虐殘
賊敗法亂刑上下不覺此亡國之時也太明發而
萬物皆照太義發而萬物皆利太兵發而萬物皆
服大哉聖人之德獨聞獨見樂哉

文啓

文王問太公曰聖人何守太公曰何憂何畜萬物
皆得何畜何憂萬物皆適政之所施莫知其化時
之所在莫知其移聖人守此而萬物化何窮之有
終而後始優之游之展轉求之求而得不可不藏
既以藏之不可不行既以行勿後明之夫天地不

自明故能長生聖人不自明故能名彰古之聖人
聚久而爲家聚家而爲國聚國而爲天下分封賢
人以爲萬國命之曰大紀陳其政教順其民俗群
曲化直變於形容萬國不通各樂其所人愛其上
命之曰大定嗚呼聖人務靜之賢人務正之愚人
不能正故與人爭上勞則刑繁刑繁則民憂民憂
則流亡上下不安其生累世不休命之曰大失天
下之人如流水障之則止啓之則行靜之則清鳴
呼神哉聖人見其所始則知其所終文王曰靜之
奈何太公曰天有常形民有常生與天下共其生

而天下靜矣太上因之其次化之夫民化而從政
是以天無爲而成事民無與而自富此聖人之德
也文王曰公言乃恊予懷夙夜念之不忘以用爲
常

文伐

文王問太公曰文伐之法奈何太公曰凡文伐有
十二節一曰因其所喜以順其志彼將生驕必有
好事苟能因之必能去之二曰親其所愛以分其
威一人兩心其中必衰廷無忠臣社稷必危三日
陰賂左右得情甚深身內情外國將生害四曰輔

其淫樂以廣其志厚賂珠玉娛以美人卑辭委聽
順命而合彼將不爭奸節乃定五曰嚴其忠臣而
薄其賂稽留其使勿聽其事亟爲置代遺以誠
事親而信之其君將復合之苟能嚴之國乃可謀
六曰収其內間其外才臣外相敵國內侵國鮮不
亡七曰欲錮其心必厚賂之収其左右忠愛陰示
以利令之輕業而蓄積空虛八曰賂以重寶因與
之謀謀而利之利之必信是謂重親重親之積必
爲我用有國而外其地必敗九曰尊之以名無難
其身示以大勢從之必信致其本尊先爲之榮微

飾聖人國乃大偷十曰下之必信以得其情承意
應事如與同生既以得之乃微收之時及將至若
天喪之十有一曰塞之以道人臣無不重貴與富
惡危死與死陰示太尊而微輸重寶收其豪傑內積
甚厚而外為之陰內智士使圖其計納勇士使高
其氣富貴甚足而常有繁滋徒黨已具是謂塞之
有國而塞安能有國十有一曰養其亂臣以迷之
進義女淫聲以惑之遺良大馬以勞之時與大勢
以誘之上察而與天下圖之十二節備乃成武事
所謂上察天下察地徵已見乃伐之

順啓

文王問太公曰如何而可為天下太公曰大蓋天
下然後能容天下信蓋天下然後能約天下仁蓋
天下然後能懷天下恩蓋天下然後能保天下權
蓋天下然後能不失天下事而不疑則天運不能
移時變不能遷此六者備然後可以為天下政故
利天下者天下啓之害天下者天下閉之生天下
者天下德之殺天下者天下賊之徹天下者天下
通之窮天下者天下仇之安天下者天下恃之危
天下者天下災之天下者非一人之天下唯有道

者處之

三疑

武王問太公曰予欲立功有三疑恐力不能攻強
離親散衆為之奈何太公曰因之慎謀用財夫攻
強必養之使強益之使張太強必折太剛必缺攻
強以強離親以親散衆以衆凡謀之道周密為寶
設之以事玩之以利爭心必起欲離其親因其所
愛與其寵人與之所欲示之所利因以疎之無使
得志彼貪利甚喜遺疑乃止凡攻之道必先塞其
明而後攻其強毀其大除民之害滯之以色陷之

以利養之以味娛之以樂既離其親必使遠民勿
使知謀扶而納之莫覺其意然後可成惠施於民
必無愛財民如牛馬數餽食之從而愛之心以啓
智智以啓財財以啓衆衆以啓賢賢之有啓以王
天下

龍韜

王翼

武王問太公曰王者帥師必有股肱羽翼以成威
神為之奈何太公曰凡舉兵帥師以將為命命在
通達不守一術因能授職各取所長隨時變化以

爲綱紀故將有肱股羽翼七十二人以應天道備
數如法審知命理殊能異技萬事畢矣武王曰請
問其目太公曰腹心一人主替謀應卒探天消變
總攬計謀保全民命謀士五人主圖安危慮未萌
論行能明賞罰授官位決嫌疑定可否天文三人
主司星曆候風氣推時日考符驗校災異知天心
去就之機地利三人主三軍行止形勢利害消息
遠近險易水涸山阻不失地利兵法九人主講論
異同行事成敗簡練兵器刺擧非法通糧四人主
度飲食備講無蓄積通糧道致五穀命三軍不困

乏奮威四人主擇材力論兵革風馳電擊不知所
由伏旗鼓二人主伏旗鼓明耳目詭符節謬號令
闇忽往來出入若神股肱四人主任重持難修溝
塹治壁壘以備守禦通才一人主拾遺補過應偶
賓客論議談語消患解結權士三人主行奇譎設
殊異非人所識行無窮之變耳目七人主往來聽
言視變覽四方之事軍中之情爪牙五人主揚威
武激勵三軍使冒難攻銳無所疑慮初翼四人主
揚名譽震遠方動四境以弱敵心遊士八人主伺
姦候變開闔人情觀敵之意以爲間諜術士三人

主為譎詐依託鬼神以惑衆心方士人主百藥
以治金瘡以痊萬病法筭一入主計會三軍營壁
糧食財用出入

論將

武王問太公曰論將之道奈何太公曰將有五材
十過武王曰敢問其目太公曰所謂五材者勇智
仁信忠也勇則不可犯智則不可亂仁則愛信則
不欺忠則無二心所謂十過者有勇而輕死者有
急而心速者有貪而好利者有仁而不忍人者有
智而心怯者有信而喜信人者有廉潔而不愛人

者有智而心緩者有剛毅而自用者有懦而喜任
人者勇而輕死者可暴也急而心速者可久也貪
而好利者可遺也仁而不忍人者可勞也智而心
怯者可窘也信而喜信人者可誑也廉潔而不愛
人者可侮也智而心緩者可襲也剛毅而自用者
可事也懦而喜任人者可欺也故兵者國之大事
存亡之道也命在於將將者國之輔也先王之所
重也故置將不可不察也故云兵不兩勝亦不兩
敗兵出踰境期不出十日不有亡國必有破軍殺將
武王曰善哉

選將

武王問太公曰王者舉兵欲簡練英雄知士之高
下為之奈何太公曰夫士外貌不與中情相應者
十五有嚴而不肖者有溫良而為盜者有貌恭敬
而心慢者有外廉謹而內無至誠者有精精而無
情者有湛湛而無誠者有好謀而無決者有如果
敢而不能者有恹恹而不信者有恍惚惚惚而反
忠實者有詭激而有功效者有外勇而內怯者有
肅肅而反易入者有嗃嗃而反靜慈者有勢虛形
劣而外出無所不至無所不遂者天下所賤聖人

所貴凡人不莫知非有大明不見其際此士之外貌
不與中情相應者也武王曰何以知之太公曰知
之有八徵一曰問之以言以觀其辭二曰窮之以
辭以觀其變三曰與之間諜以觀其誠四曰明白
顯問以觀其德五曰使之以財以觀其廉六曰試
之以色以觀其貞七曰造之以難以觀其勇八曰
醉之以酒以觀其態八徵皆備則賢不肖皆別矣

立將

武王問太公曰立將之道奈何太公曰凡國有難
君避正殿召將而詔之曰社稷安危一在將軍今

其國不臣願將軍帥師應之將既受命乃命太史
卜齋三日之大廟鑽靈龜卜吉日以授斧鉞君入
廟門北面而立君親操越鉞持首授將其柄曰從此
上至天者將軍制之復操斧持柄授將其刃曰從
此下至淵者將軍制之見其虛則進見其實則止
勿以三軍為衆而輕敵勿以受命為重而必死勿
以身貴而賤人勿以獨見而違衆勿以辨說為必
然士未坐勿坐士未食勿食寒暑必同如此則士
衆必盡死力將已受命拜而報君曰臣聞國不可
從外治軍不可從中御二心不可以事君疑志不

可以應敵臣既受命專斧鉞之威臣不敢生還願
君亦垂一言之命於臣君不許臣臣不敢將君許
之乃辭而行軍中之事不聞君命皆由將出臨敵
決戰無有二心若此則無天於上無地於下無敵
於前無君於後是故智者為之謀勇者為之闘氣
厲青天疾若馳騫兵不接刃而敵降服戰勝於外
功立於內吏遷上賞百姓懽悅將無咎殃是故風
雨時節五穀豐登社稷安寧武王曰善哉

將威

武王問太公曰將何以爲威何以爲明何以爲禁

止而令行太公曰將以誅大為威以賞小為明以
罰審為禁止而令行故殺一人而三軍震者殺之
賞一人而萬人悅者賞之殺貴大賞貴小殺及其當
路貴重之人臣是刑上極也賞及牛豎馬洗廐養之
徒是賞下通也刑上極賞下通是將威之所行也

勵軍

武王問太公曰吾欲令三軍之衆攻城爭先登野
戰爭先赴聞金聲而怒聞鼓聲而喜為之奈何太
公曰將有三武王曰敢問其目太公曰將冬不服
裘夏不操扇雨不張蓋名曰禮將將不身服禮無

以知士卒之寒暑出隘塞犯泥塗將必先下步名
曰力將將不身服力無以知士卒之勞苦軍皆定
次將乃就舍炊者皆熟將乃就食軍不舉火將亦
不舉名曰止欲將將不身服止欲無以知士卒之
飢飽將與士卒共寒暑勞苦飢飽故三軍之衆聞
鼓聲則喜聞金聲則怒高城深池矢石繁下士爭
先登白刃始合士爭先赴士非好死而樂傷也為
其將知寒暑飢飽之審而見勞苦之明也

陰符

武王問太公曰引兵深入諸侯之地三軍卒有緩

急或利或害吾將以近通遠從中應外以給三軍之用為之奈何太公曰主與將有陰符凡八等有
大勝克敵之符長一尺破軍擒將之符長九寸降
城得邑之符長八寸却敵報遠之符長七寸警衆
堅守之符長四寸失利亡士之符長三寸諸奉使
行符稽留若符事聞泄告者皆誅之八符者主將
秘聞所以陰通言語不泄中外相知之術敵雖聖
智莫之能知武王曰善哉

陰書

武王問太公曰引兵深入諸侯之地主將欲合兵
行無窮之變圖不測之利其事煩多符不能明相
去遠遠言語不通為之奈何太公曰諸有陰事太
慮當用書不用符主以書遺將將以書問主書無
字皆一合而再離三發而一知再離者分書為三
部三發而一知者言三人人操一令相參而不相
知情也此謂陰書敵雖聖智莫之能識武王曰善
哉

軍勢

武王問太公曰攻伐之道奈何太公曰資因敵家
之動變生於兩陣之間奇正發無窮之源故至事

不語用兵不言且事之至者其言不足聽也兵之
用者其狀不足見也倏而往忽而來能獨專而不
制者兵也夫兵聞則議見則圖知則困辨則危故
善戰者不待張軍善除患者理於未生善勝敵者
勝於無形上戰無與戰故爭勝於白刃之前者非
良將也設備於已失之後者非上聖也智與衆同
非國師也枝與衆同非國上也事莫大於必克用
莫大於玄默動莫大於不意謀莫大於不識夫先
勝者先見弱於敵而後戰者也故事半而功倍焉
聖人徵於天地之動孰知其紀循陰陽之道而從
其候當天地盈縮因以為常物有死生因天地之
形故曰未見形而戰雖衆必敗善戰者居之不撓
見勝則起不勝則止故曰無恐懼無猶豫用兵之
害猶豫最大三軍之災莫過狐疑善者見利不失
遇時不疑失利後時反受其殃故智者從之而不
釋失巧者一決而不猶豫是以疾雷不及掩耳迅電
不及瞋目赴之若驚馬用之若狂當之者破近之者
亡孰能禦之夫將有所不言而守者神也有所不
見而視者明也故知神明之道者野無衝敵對無
立國武王曰善哉

奇兵

武王問太公曰凡用兵之道太要如何太公曰古
之善戰者非能戰於天上非能戰於地下其成與
敗皆由神勢得之者昌失之者亡夫兩陣之間出
甲陳兵紛卒亂行者所以為變也深草叢蘂者所
以遁逃也谿谷險阻者所以止車禦騎也隘塞山
林者所以少擊衆也坳澤窳冥者所以匿其形也
清明無隱者所以戰勇力也疾如流矢擊如發機
者所以破精微也詭伏設奇遠張誑誘者所以破
軍擒將也四分五裂者所以擊圓破方也因其驚

駭者所以一擊十也因其勞倦暮舍者所以十擊
百也奇技者所以越深水渡江河也強弩長兵者
所以踰水戰也長關遠候暴疾謬遁者所以降城
服邑也鼓行謹置者所以行奇謀也大風甚雨者
所以搏前擒後也偽稱敵使者所以絕糧道也謬
號令與敵同服者所以備走北也戰必以義者所
以勵衆勝敵尊爵重賞者所以勸用命也嚴刑重
講無罰者所以進罷怠也一喜一怒一與一奪一
文一武一徐一疾者所以調和二軍制一臣下也
處高敞者所以警守也保險阻者所以為固也山

林茂穢者所以默往來也深溝高壘積糧多者所以持久也故曰不知戰攻之策不可以語敵不能分移不可以語奇不通治亂不可以語變故曰將不仁則三軍不親將不勇則三軍不銳將不智則三軍大疑將不明則三軍大傾將不精微則三軍失其機將不常戒則三軍失其備將不強力則三軍失其職故將者人之司命三軍與之俱治與之俱亂得賢將者兵強國昌不得賢將者兵弱國亡
武王曰善哉

五音

武王問太公曰律音之聲可以知三軍之消息勝負之決乎太公曰深哉王之問也夫律管十二其要有五音宮商角徵羽此真正聲也萬代不易五行之神道之常也可以知敵金木水火土各以其勝攻之古者三皇之世虛無之情以制剛強無有文字皆由五行五行之道天地自然六甲之分微妙之神其法以天清淨無陰雲風雨夜半遣輕騎往至敵人之壘去九百步外偏持律管當耳大呼驚之有聲應管其來甚微角聲應管當以白虎徵聲應管當以玄武商聲應管當以朱雀羽聲應管

當以勾陳五管鼓盡不應者宮也當以青龍此五行之符佐勝之徵成敗之機武王曰善哉太公曰徵妙之音皆有外候武王曰何以知之太公曰敵人驚動則聽之聞枹鼓之音者角也見火光者徵也聞金鐵不戰之音者商也聞人嘯呼之音者羽也寂寞無聞者宮也此五者聲色之術也

兵徵

武王問太公曰吾欲未戰先知敵人之強弱豫見勝負之徵為之奈何太公曰勝負之徵精神先見明將察之其效在人謹候敵人出入進退察其動

靜言語如祥士卒所告凡三軍悅懌士卒畏法敬其將命相喜以破敵相陳以勇猛相賢以威武此強徵也三軍數驚士卒不齊相恐以敵強相語以不利耳目相屬妖言不止衆口相惑不畏法令不重其將此弱徵也三軍齊數兵陳勢上固深溝高壘又有大風甚雨之利三軍無故旌旗前指金鐸之聲揚以清鼙鼓之聲宛以鳴此得神明之助大勝之徵也行陣不固旌旗亂而相繞逆大風甚雨之利士卒恐懼氣絕而不屬戎馬驚奔兵車折軸金鐸之聲下以濁鼙鼓之聲濕如沐此大敗之徵也

凡攻城圍邑城之氣色如死灰城可屠城之氣出而北城可克城之氣出而西城可降城之氣出而南城不可拔城之氣出而東城不可攻城之氣出而後入城主逃北城之氣出而覆我軍之上軍必病城之氣出高而無所止用兵長久凡攻城圍邑過旬不雷不雨必亟去之城必有大輔此所以知可攻而攻不可攻而止武主曰善哉

農器

武主問太公曰天下安定國家無事戰攻之具可無修乎守禦之備可無設乎太公曰戰攻守禦之

具盡在於人事來耜者其行馬疾黎也馬牛車輿者其營壘蔽櫓也鋤耨之具其矛戟也蓑薛笠笠者其甲冑干楯也鑊鋪斧鋸杵臼其攻城器也牛馬所以轉輸糧用也谿犬其伺候也婦人織紵其旌旗也丈夫平壤其攻城也春鋤草棘其戰車騎也夏耨田疇其戰步兵也秋刈禾薪其糧食儲備也冬實倉廩其堅守也田里相伍其約束符信也里有吏官有長其將帥也里有周垣不得相過其隊分也輸粟收芻其廩庫也春秋治城郭修溝渠其壘壘也故用兵之具盡在於人事也善為國者

取於人事故必使遂其六畜闢其田野安其處所夫夫治田有畝數婦人織紵有尺度是富國強兵之道也武王曰善哉

虎韜

軍用

武王問太公曰王者舉兵三軍器用攻守之具科品衆寡豈有法乎太公曰大哉王之問也夫攻守之具各有科品此兵之大威也武王曰願聞之太公曰凡用兵之大數將甲士萬人法用武衛大扶胥三十六乘材士強弩矛戟爲翼一車二十四人

推之以八尺車輪立車上旗鼓兵法謂之震駭陷堅陣敗強敵武翼大楸矛戟扶胥七十二具材士強弩矛戟爲翼以五尺車輪絞車連弩自副陷堅陣敗強敵提翼小楸扶胥一百四十九具絞車連弩自副以鹿車輪陷堅陣敗強敵大黃參連弩大扶胥三十六乘材士強弩矛戟爲翼飛鳧電影自副飛鳧赤莖白羽以銅爲首電影青莖赤羽以鐵爲首晝則以絳縞長六尺廣六寸爲光耀夜則以白縞長六尺廣六寸爲流星陷堅陣敗步騎大扶胥衛車三十六乘螳螂武士共載可以縱擊橫可以

敗敵緇車騎寇一名電車兵法謂之電擊陷堅陣
敗步騎寇夜來前矛戟扶胥輕車二百六十乘螳
螂武士三人共載兵法謂之霆擊陷堅陣敗步騎
方首鐵楯維盼重十二斤柄長五尺以上千二百
枚一名天楮大柯斧刃長八寸重八斤柄長五尺
以上千二百枚一名天鉞方首鐵鎚重八斤柄長
五尺以上千二百枚一名天鎚敗步騎群寇飛鉤
長八寸鈎芒長四寸柄長六尺以上千二百枚以
投其衆三軍拒守衆螳螂劔刃扶胥廣二丈百二
十具一名行馬平易地以步兵敗車騎木蒺藜去

地二尺五寸百二十具敗步騎要窮寇遮走北軸
旋短衝矛戟扶胥百二十具黃帝所以敗蚩尤氏
敗步騎要窮寇遮走北狹路微徑張鐵蒺藜芒高
四寸廣八寸長六尺以上千二百具敗步騎突頭
來前促戰白刃接張地羅鋪兩鍬蒺藜參連織女
芒間相去二尺萬二千具曠野草中方首鉞矛千
二百具張鉞矛法高一尺五寸敗步騎要窮寇遮
走北狹路微徑地陷鐵械鎖參連百二十具敗步
騎要窮寇遮走北壘門拒守矛戟小櫓十二具絞
車連弩自副三軍拒守天羅虎落鎖連一部廣一

尖五尺高八尺五百二十具渡溝漸飛橋一間廣
 一丈五尺長二丈以上著轉關轆轤八具以環利
 通索張之渡大水飛江廣一丈五尺長二丈以上
 八具以環利通索張之天浮鐵鐘蝦矩內圓外徑
 四尺以上環絡自副三十二具以天浮張飛江濟
 大海謂之天潢一名天缸山林野居結虎落樂營
 環利鐵鎖長二丈以上千二百枚環利大通索大
 四寸長四丈以上六百枚環利中通索大二寸長
 四丈以上二百枚環利小微縲長二丈以上萬二
 千枚天雨蓋重車上板結泉鉏鍔廣四尺長四丈

以上車一具以鐵杙張之伐木斧重八斤柄長
 三尺以上三百枚榮鑊刃廣六寸柄長五尺以上
 三百枚銅築固為垂長五尺以上三百枚鷹爪方
 臂鐵杷柄長七尺以上三百枚方臂鐵力柄長七
 尺以上三百枚方臂兩枝鐵力柄長七尺以上三
 百枚芟草木大鏃柄長七尺以上三百枚大櫓刃
 重八斤柄長六尺三百枚委環鐵杙長三尺以上
 三百枚椽杙大鎚重五斤柄長二尺以上百二十
 具甲士萬人強弩六千戟櫓二千矛楯二千修治
 攻具砥礪兵器巧手三百人此舉兵軍用之大數

也武王曰允哉

三陳

武王問太公曰凡用兵為天陳地陳人陳奈何太公曰日月星辰斗柄一左一右一向一背此謂天陳丘陵水泉亦有前後左右之利此謂地陳用車用馬用文用武此謂人陳武王曰善哉

疾戰

武王問太公曰敵人圍我斷我前後絕我糧道為之奈何太公曰此天下之困兵也暴用之則勝徐用之則敗如此者為四武衝陳以武車驍騎首為亂其軍而疾擊之可以橫行武王曰若已出圍地欲因以為勝為之奈何太公曰左軍疾左右軍疾右無與敵人爭道中軍迭前迭後敵人雖多其將可走

必出

武王問太公曰引兵深入諸侯之地敵人四合而圍我斷我歸道絕我糧食敵人既眾糧食甚多陰阻又固我欲必出為之奈何太公曰必出之道器械為寶勇鬪為首審知敵人空虛之地無入之處可以必出將士人持玄旗操器械設銜枚夜出勇

力飛足冒將之士居前平壘爲軍開道材士強弩
爲伏兵居後弱卒車騎居中陳畢徐行慎無驚駭
以武衝扶胥前後拒守武翼大櫓以蔽左右敵人
若驚勇敢冒將之士疾擊其前弱卒車騎以屬其
後材士強弩隱伏而處審候敵人追我伏兵疾擊
其後多其火鼓若從地出若從天下三軍勇鬪莫
我能禦武主曰前有大水廣漸深坑我欲踰渡無
舟楫之備敵人屯壘限我軍前塞我歸道斥候常
戒險塞盡守車騎要我前勇士擊我後爲之柰何
太公曰大水廣漸深坑敵人所不守或能守之其

卒必寡若此者以飛江轉關與天潢以濟吾軍勇
力材士從我所指衝敵絕陳皆致其死先燔吾輜
重燒吾糧食明告吏士勇鬪則生不勇則死已出
令我踵軍設雲火遠候必依草木丘墓險阻敵人
車騎必不敢遠追長驅因以火爲記先出者今至
火而止爲四武衝陳如此則吾三軍皆精銳勇鬪
莫我能止武主曰善哉

軍略

武主問太公曰引兵深入諸侯之地遇深谿大谷
險阻之水吾三軍未得畢濟而天暴雨流水大至

後不得屬於前無有舟梁之備又無水草之資吾
欲畢濟使三軍不稽留為之奈何太公曰凡帥師
將衆慮不先設器械不備教不精信士卒不習若
此不可以為王者之兵也凡三軍有大事莫不習
用器械攻城圍邑則有輶輜臨衝視城中則有雲
梯飛樓三軍行止則有武衝大櫓前後拒守絕道
遮街則有材士強弩衛其兩旁設營壘則有天羅
武落行馬疾藜晝則登雲梯遠望立五色旌旗夜
則設雲火萬炬擊雷鼓振聲鐸吹鳴茄越溝壘則
有飛橋轉關轆轤鉏鋤濟大水則有天潢飛江逆
波上流則有浮海絕江三軍用備主將何憂

臨境

武王問太公曰吾與敵人臨境相拒彼可以來我
可以往陣皆堅固莫敢先舉我欲往而襲之彼亦
可來為之奈何太公曰分兵三處令我前軍深溝
增壘而無出列旌旗擊鼓完為守備令我後軍
多積糧食無使敵人知我意發我銳士潛襲其中
擊其不意攻其無備敵人不知我情則止不來矣
武王曰敵人知我之情通我之機動而得我事其
銳士伏於深草要我隘路擊我便處為之奈何太

公曰令我前軍日出挑戰以勞其意令我老弱曳柴揚塵鼓呼而往來或出其左或出其右去敵無過百步其將必勞其卒必駭如此則敵人不敢來吾往者不止或襲其內或擊其外三軍疾戰敵人必敗

動靜

武王問太公曰引兵深入諸侯之地與敵人軍相當兩陣相望衆寡強弱相等不敢先舉吾欲令敵人將帥恐懼士卒心傷行陣不固後陣欲走前陣數顧鼓噪而乘之敵人逐走爲之奈何太公曰如

此者發吾兵去寇十里而伏其兩旁直騎百里而越其前後多其旌旗益其金鼓戰合鼓噪而俱起敵將必恐其軍驚駭衆寡不相救貴賤不相待敵人必敗武王曰敵之地勢不可以伏其兩旁直騎又無以越其前後敵知我慮先施其備我士卒心傷將帥恐懼戰則不勝爲之奈何太公曰微哉王誠哉王之間也如此者先戰五日發我遠候往視其動靜審候其來設伏而待之必於死地與敵相避遠我旌旗疎我行陣必奔其前與敵相當戰合而走擊金無止三里而還伏兵乃起或隨其兩旁或擊其

前後三軍疾戰敵人必走武王曰善哉

金鼓

武王問太公曰引兵深入諸侯之地與敵相當而天大寒甚暑日夜霜雨旬日不止溝壘悉壞隘塞不守斥候懈怠士卒不戒敵人夜來三軍無備上下惑亂為之奈何太公曰凡三軍以戒為固以怠為敗令我壘上誰何不絕人執旌旗外內相望以號相命勿令之音而皆外向三千人為一也識而約之各慎其處敵人若來視我軍之營戒至而必還力盡氣息發我鎗士隨而擊之武王曰敵人知

我隨之而伏其鎗士佯北不止過伏而還或擊我前或擊我後或薄我壘吾三軍大恐優亂失次離其處所為之奈何太公曰分為二隊隨而追之勿越其伏二隊俱至或擊其前後或陷其兩旁明號密令疾擊而前敵人必敗

絕道

武王問太公曰引兵深入諸侯之地與敵相守敵人絕我糧道又越我前後吾欲戰則不可勝欲守則不可久為之奈何太公曰凡深入敵人之境必察地之形勢務求便利依山林險阻水泉林木而

為之固謹守關梁又知城邑兵墓地形之利如是
則我軍堅固敵人不能絕我糧道又不能越我前
後武王曰吾三軍過大陵廣澤平易之地吾候望
候失卒與敵人相薄以戰則不勝以守則不固敵
人翼我兩旁越我前後三軍大恐為之奈何太公
曰凡帥師之法常先發遠候去敵二百里審知敵
人所在地勢不利則以武衝為壘而前又置兩踵
軍於後遠者百里近者五十里即其警言急前後相
救吾三軍常完堅必無毀傷武王曰善哉

略地

武王問太公曰戰勝深入略其地有大城不可下
其別軍守險與我相拒我欲攻城圍邑恐其別軍
卒至而擊我中外相合拒我表裏三軍大亂上下
恐駭為之奈何太公曰凡攻城圍邑車騎必遠屯
衛警戒阻其外內中人絕糧外不得輸城人約誓
其將必降武王曰中人絕糧外不得輸陰為恐怖
相與密謀夜出窮寇死戰其車騎銳士或衝我內
或擊我外士卒迷惑三軍敗亂為之奈何太公曰
如此者當分軍為三軍謹視地形而處審知敵入
別軍所在及其大城別堡為之置遺缺之道以利

其心謹備勿失敵人恐懼不入山林即歸太邑走其別軍車騎遠要其前勿令遺脫中人以為先出者得其徑道其練卒林士必出其老弱獨在車騎深入長驅敵人之軍必莫敢至慎勿與戰絕其糧道圍而守之必久其日無燔人積聚無毀人宮屋冢樹社叢勿伐降者勿殺得而勿戮示之以仁義施之以厚德令其士民曰罪在一人如此則天下和服武王曰善哉

火戰

武王問太公曰引兵深入諸侯之地遇深草蒺藜周吾軍前後左右三軍行數百里人馬疲倦休止敵人因天燥疾風之利燔吾上風車騎銳士堅伏吾後吾三軍恐怖散亂而走為之奈何太公曰如此者則以雲梯飛樓遠望左右謹察前後見火起即燔吾前而廣延之又燔吾後敵人苟至則引軍而却按黑地而堅處敵人之來猶在吾後見火起必遠走吾按黑地而處強弩材士衛吾左右又燔吾前後如此則敵不能害我武王曰敵人燔吾左右又燔吾前後煙覆吾軍其太兵按黑地而起為之奈何太公曰如此者為四武衝陣強弩翼吾左

右其法無勝亦無負

壘虛

武王問太公曰何以知敵壘之虛實自來自去太公曰將必上知天道下知地利中知人事登高下望以觀敵之變動望其壘則知其虛實望其士卒則知其去來武王曰何以知之太公曰聽其鼓無音鐸無聲望其壘上多飛鳥而不驚上無氛氣必知敵詐而為偶人也敵人卒去不遠未定而後返者彼用其士卒太疾也太疾則前後不相次不相次則行陣必亂如此者急出兵擊之以少擊衆則必勝矣

豹韜

林戰

武王問太公曰引兵深入諸侯之地遇大林與敵分林相拒吾欲以守則固以戰則勝為之奈何太公曰使吾二軍分為衝陣便兵所處弓弩為表戟楯為裏斬除草木極廣吾道以便戰所高置旌旗謹勅三軍無使敵人知吾之情是謂林戰林戰之法率吾矛戟相與為伍林間木疎以騎為輔戰車居前見便則戰不見便則止林多險阻必置衝陣

以備前後三軍疾戰敵人雖衆其將可走更戰更
息各按其部是謂林戰之紀

突戰

武王問太公曰敵人深入長驅侵掠我地驅我牛
馬其三軍大至薄我城下我士卒大恐人民係累
為敵所虜吾欲以守則固以戰則勝為之奈何太
公曰如此者謂之突兵其牛馬必不得食士卒絕
糧暴擊而前令我遠邑別軍選其銳士疾擊其後
審其期日必會於晦三軍疾戰敵人雖衆其將可
虜武王曰敵人分為三軍或戰而侵掠我地或止

而收我牛馬其大軍未盡至而使寇薄我城下致
吾三軍恐懼為之奈何太公曰謹候敵人未盡至
則設備而待之去城四里而為壘金鼓旌旗皆列
而張別隊為伏兵令我壘上多積強弩百步一突
門門有行馬車騎居外勇力銳士隱伏而處敵人
若至使我輕卒合戰而佯走令我城上立旌旗擊
鼙鼓完為守備商人以我為守城必講無字薄我城
下發我伏兵以衝其內或擊其外三軍疾戰或擊
其前或擊其後勇者不得鬪輕者不及走名云突
戰敵人雖衆其將必走武王曰善哉

敵強

武王問太公曰引兵深入諸侯之地與敵人衝軍相當敵衆我寡敵強我弱敵人夜來或攻吾左或攻吾右三軍震動吾欲以戰則勝以守則固爲之奈何太公曰如此者謂之震寇利以出戰不可以守選吾材士強弩車騎爲之左右疾擊其前急攻其後或擊其表或擊其裏其卒必亂其將必駭武王曰敵人遠遮我前急攻我後斷我銳兵絕我材士我內外不得相聞三軍擾亂皆取而走士卒無鬪志將吏無守心爲之奈何太公曰明哉王之問

也當明號審令出我勇銳冒將之士人操炬火二人同鼓必知敵人所至或擊其表或擊其裏其表直作微號相知令之滅火鼓音皆止中外相應期約皆當三軍疾戰敵必敗亡武王曰善哉

敵武

武王問太公曰引兵深入諸侯之地卒遇敵人甚衆且武武車驍騎繞我左右吾三軍皆震走不可止爲之奈何太公曰如此者謂之敗兵善者以勝不善者以亡武王曰爲之奈何太公曰伏我材士強弩武車驍騎爲之左右常去前後三里敵人逐

我發我車騎衝其左右如此則敵人擾亂吾走者
自止武王曰敵人與我車騎相當敵衆我少敵強
我弱其來整治精銳吾陣不敢當為之奈何太公
曰選我材士強弩伏於左右車騎堅陣而處敵人
邊我伏兵積弩射其左右車騎銳兵疾擊其軍或
擊其前或擊其後敵人雖衆其將必走武王曰善
哉

鳥雲山兵

武王問太公曰引兵深入諸侯之地遇高山盤石
其上亭亭無有草木四面受敵吾三軍恐懼士卒

迷惑吾欲以守則固以戰則勝為之奈何太公曰
凡三軍處山之高則為敵所栖處山之下則為敵
所囚既以被山而處必為鳥雲之陣鳥雲之陣陰
陽皆備或屯其陰或屯其陽處山之陽備山之陰
處山之陰備山之陽處山之左備山之右處山之
右備山之左其山敵所能陵者兵備其表衢道通
谷絕以武車高置旌旗謹勅三軍無使敵人知吾
之情是謂山城行列已定士卒已陣法令已行奇
正已設各置衝陣於山之表便兵所處乃分車騎
為鳥雲之陣三軍疾戰敵人雖衆其將可擒也

鳥雲澤兵

武王問太公曰引兵深入諸侯之地與敵人臨水相拒敵富而衆我貧而寡踰水擊之則不能前欲及其日則糧食少吾居斥鹵之地四旁無邑又無草木三軍無所掠取牛馬無所芻牧爲之奈何太公曰三軍無備牛馬無食士卒無糧如此者索便詐敵而亟去之設伏兵於後武王曰敵不可得而詐吾士卒迷惑敵人越我前後吾三軍敗亂而走爲之奈何太公曰求途之道金玉爲主必因敵使精微爲寶武王曰敵人知我伏兵大軍不肯濟別

將分隊以踰於水吾三軍大恐爲之奈何太公曰如此者分爲衝陣便兵所處須其畢出發我伏兵疾擊其後強弩兩旁射其左右車騎分爲鳥雲之陣備其前後三軍疾戰敵人見我戰合其大軍必濟水而來發我伏兵疾擊其後車騎衝其左右敵人雖衆其將可走凡用兵之大要當敵臨戰必置衝陣便兵所處然後以車騎分爲鳥雲之陣此用兵之奇也所謂鳥雲者鳥散而雲合變化無窮者也武王曰善哉

少衆

武王問太公曰吾欲以少擊衆以弱勝強爲之奈何
太公曰以少擊衆者必以日之暮伏於深草要
之隘路以弱擊強者必待大國之與鄰國之助武
王曰我無深草又無隘路敵人已至不適日暮我
無大國之與又無鄰國之助爲之奈何太公曰妄
張詐誘以焚或其將迂其道令過深草遠其道令
會日暮前行未渡水後行未及舍發我伏兵疾擊
其左右車騎擾亂其前後敵人雖衆其將可走事
大國之君下鄰國之士厚其幣卑其辭如此則得
大國之與鄰國之助矣武王曰善哉

分險

武王問太公曰引兵深入諸侯之地與敵人相遇
於險阨之中吾左山而右水敵右山而左水與我
分險相拒吾欲以守則固以戰則勝爲之奈何太
公曰處山之左急備山之右處山之右急備山之
左險有大水無舟楫者以天潢濟吾三軍已濟者
坐廣吾道以便戰所以武衝爲前後列其強弩令
行陣皆固衢道谷口以武衝絕之高置旌旗是謂
軍城凡險戰之法以武衝爲前大櫓爲衛材士強
弩翼吾左右三千人爲一屯必置衝陣便兵所處

左軍以左右軍以右中軍以中並攻而前已戰者
還歸中府更戰更息必勝乃止武王曰善哉

犬韜

分合

武王問太公曰王者帥師三軍分為數處將欲期
會合戰約誓賞罰為之奈何太公曰凡用兵之法
三軍之衆必有分合之變其大將先定戰地戰日
然後移檄書與諸將吏期攻城圍邑各會其所明
告戰日漏刻有時大將設營而陣立表轅門清道
而待諸將吏至者校其前後先期至者賞後期至

者斬如此則遠近奔集三軍俱至併力合戰

武鋒

武王問太公曰凡用兵之要必有武車驍騎馳陣
選鋒見可則擊之如何而可擊太公曰夫欲擊者
當審察敵人十四變變見則擊之敵必敗武王曰
十四變可得聞乎太公曰敵人新集可擊人馬未
食可擊天時不順可擊地形未得可擊奔走可擊
不戒可擊疲勞可擊將離士卒可擊涉長路可擊
濟水可擊不暇可擊阻難狹路可擊亂行可擊心
怖可擊

練士

武王問太公曰練士之道奈何太公曰軍中有大
勇敢死樂傷者聚為一卒各云冒刃之士有銳氣
壯勇強暴者聚為一卒各云隨陣之士有奇表長
劍接武齊死者聚為一卒各云勇銳之士有披距
伸鉤強梁多力潰破金鼓絕滅旗旌者聚為一卒
各云勇敢之士有踰高絕遠輕卒善走者聚為一
卒各曰寇兵之士有王臣失勢欲復見功者聚為
一卒各曰死闘之士有死將之人子弟欲為其將
報仇者聚為一卒各曰死憤之士有貧窮忿怒欲

快其志者聚為一卒各曰必死之士有贅塔人虜
欲掩迹揚名者聚為一卒各云勵鈍之士有胥靡
免罪之人欲逃其耻者聚為一卒各云倖用之士
有材技兼人能負重致遠者聚為一卒各云待命
之士此軍之練士不可不察也

教戰

武王問太公曰合三軍之衆欲令士卒服習教戰
之道奈何太公曰凡領三軍必有金鼓之節所以
整齊士衆者也將必先明告吏士申之以三令以
教操兵起居旌旗指麾之變法故教吏士使一人

六節

何一曰

學戰教成合之十人十人學戰教成合之百人百人學戰教成合之千人千人學戰教成合之萬人萬人學戰教成合之二軍之衆大戰之法教成合之百萬之衆故能成其大兵立威於天下武王曰善哉

均兵

武王問太公曰以車與步卒戰一車當幾步卒幾步卒當一車以騎與步卒戰一騎當幾步卒幾步卒當一騎以車與騎戰一車當幾騎幾騎當一車太公曰車者軍之羽翼也所以陷堅陣要強敵遮

走北也騎者軍之伺候也所以踵敗軍絕糧道擊便寇也故車騎不敵戰則一騎不能當步卒一人三軍之衆成陣而相當則易戰之法一車當步卒八十人八十人當一車一騎當步卒八人八人當一騎一車當十騎十騎當一車險戰之法一車當步卒四十人四十人當一車一騎當步卒四人四人當一騎一車當六騎六騎當一車夫車騎者軍之武兵也十乘敗千人百乘敗萬人十騎走百人百騎走千人此其大數也武王曰車騎之吏數陣法奈何太公曰置車之吏數五車一長十車一吏

五十車一卒百重一將易戰之法五車為列相去四十步左右十步隊間六十步險戰之法車必循道十車為聚一平車為屯前後相去二十步左右六步隊間二十六步五車一長縱橫相去一里各返故道置騎之吏數五騎一長十騎一吏百騎卒二百騎一將易戰之法五騎為列前後相去二十步左右四步隊間五十步險戰者相去前後十步左右二步隊間二十五步三十騎為一屯六十騎為一輩十騎一吏縱橫相去百步周還各復故處武王曰善哉

武車士

武王問太公曰選車士奈何太公曰選車士之法取年四十以下長七尺五寸以上走能逐奔馬及馳而乘之前後左右上下周旋能縛束旌旗力能穀八石弩射前後左右皆便習者名云武車之士不可不厚也

武騎士

武王問太公曰選騎士奈何太公曰選騎士之法取年四十以下長七尺五寸已上壯健捷疾超絕倫等能馳騁穀射前後左右周旋進退越溝壑登

丘陵冒險阻絕大澤馳強敵亂大衆者名云武騎之士不可不厚也

戰車

武王問太公曰戰車奈何太公曰步貴知變動車貴知地形騎貴知別徑奇道二雷同名而異用也凡軍之死地有十其勝地有八武王曰十死之地奈何太公曰往而無以還者車之死地也越絕險阻乘敵遠行者車之竭地也前易後險者車之困地也陷之險阻而難出者車之絕地也墮下漸澤黑土黏埴者車之勞地也左險右易上陵仰阪者

車之逆地也殷草橫畝犯歷之澤者車之拂地也車少地易與步不敵者車之敗地也後有溝瀆左有深水右有峻阪者車之壞地也日夜霖雨旬日不止道路潰陷前不能進後不能解者車之陷地也此十者車之死地也故拙將之所以見擒明將之所以能避也武王曰八勝之地奈何太公曰敵之前後行陣未定即陷之旌旗擾亂人馬數動即陷之士卒或前或後或左或右即陷之陣不堅固士卒前後相顧即陷之前往而疑後往而怯即陷之三軍卒驚皆薄而起即陷之戰於易地暮不能

解即陷之遠行而暮舍三軍恐懼即陷之此八者
車之勝地也將明於十害八勝敵雖圍周十乘萬
騎前驅旁馳萬戰必勝武王曰善哉

戰騎

武王問太公曰戰騎奈何太公曰騎有十勝九敗
武王曰十勝奈何太公曰敵人始至行陳未定前
後不屬陷其前騎擊其左右敵人必走敵人行陳
整齊堅固士卒欲闕吾騎翼而勿去或馳而往或
馳而來其疾如風其暴如雷白晝而昏數更旌旗
變易衣服其軍可克敵人行陳不固士卒不闕薄


其前後猶其左右翼而擊之敵人必懼敵人暮欲
歸舍三軍恐駭翼其兩旁疾擊其後薄其壘口無
使得入敵人必敗敵人無險阻保固深入長驅絕
其糧路敵人必飢地平易四面見敵車騎陷之
敵人必亂敵人奔走士卒散亂或翼其兩旁或掩
其前後其將可擒敵人暮返其兵甚衆其行陣必
亂令我騎十而為隊百而為屯車五而為聚十而
為群多設旌旗雜以強弩或擊其兩旁或絕其前
後敵將可虜此騎之十勝也武王曰九敗奈何太
公曰凡以騎陷敵而不能破陣敵人佯走以車騎

返擊我後此騎之敗地也追北踰險長驅不_レ定敵
人伏我兩旁又絕我後此騎之圍地也往而無以
返入而無以出是謂陷於天井頓於地穴此騎之
死地也所從入者隘所從出者遠彼弱可以擊我
強彼寡可以擊我衆此騎之沒地也太澗深谷繁
茂林木此騎之竭地也左右有承前有大阜後有
高山三軍戰於兩水之間敵居表裏此騎之艱地
也敵人絕我糧道往而無以返此騎之困地也汙
下沮澤進退漸洳此騎之患地也左有深溝右有
坑阜高下如平地進退誘敵此騎之陷地也此九
者此騎之死地也明將之所以遠避闇將之所以
陷敗也

戰步

武王問太公曰步兵與車騎戰奈何太公曰步兵與
車騎戰者必依丘陵險阻長兵強弩居前短兵弱
弩居後更發更止敵之車騎雖衆而至堅陣疾戰
材士強弩以備我後武王曰吾無丘陵又無險阻
敵人之至既衆且武車騎翼我兩旁獵我前後吾
三軍恐怖亂散而走爲之奈何太公曰令我士卒
爲行馬木講無木字蒺藜置牛馬隊伍爲四武衝陣

敵車騎將來均置疾發掘地匝後廣深五尺名曰
命籠入操行馬進趨闌車以為壘推而前後立而
為屯材士強弩備我左右然後令我三軍皆疾戰
而必解武王曰善哉



六韜終

